



20 19 йил «25» 01

№ 08-37

«___» _____ 20__ год

**Ўзбекистон Республикаси олий ва ўрта махсус таълим
вазирининг 2018 йил 31 декабрдаги 1070-сон буйруғи
ижросини таъминлаш тўғрисида**

Ўзбекистон Республикаси Президентининг 2018 йил 5 июндаги “Олий таълим муассасаларида таълим сифатини ошириш ва уларнинг мамлакатда амалга оширилаётган кенг қамровли ислохотларда фаол иштирокини таъминлаш бўйича қўшимча чора-тадбирлар тўғрисида”ги ПҚ–3775-сон қарори 11-банди ва Ўзбекистон Республикаси Бош вазирининг А.Абдухакимов томонидан тасдиқланган Олий таълим муассасаларида талабаларни илмий фаолиятга йўналтириш ва уларда инновацион фикрлашни шакллантириш бўйича чора-тадбирлар дастури (2018 йил 14 август, 24/1-2020-сон) ҳамда Ўзбекистон Республикаси олий ва ўрта махсус таълим вазирининг 2018 йил 31 декабрдаги “Олий таълим муассасаларида талабалар орасида янги лойиҳа ва ишланмалар учун танловлар ўтказиш тўғрисида”ги 1070-сон буйруғига асосан

Б У Ю Р А М А Н:

1. Ўзбекистон Республикаси олий ва ўрта махсус таълим вазирининг 2018 йил 31 декабрдаги 1070-сон буйруғи маълумот ва ижро учун қабул қилинсин.

2. Илмий тадқиқотларни мувофиқлаштириш ва илмий-педагог кадрларни тайёрлаш бўлими (Ж.Абдурахмонхўжаев) ҳамда Илмий-инновацион ишланмаларни тижоратлаштириш бўлими (М.Ўразалиев) жорий йилнинг март ойида талабалар орасида янги стартаплар учун танловларни ҳамда “Энг яхши мустақил иш”, “Энг яхши ижодий ёндашув”, “Энг яхши инновацион ғоя” ва “Инновацион таълим” лойиҳалари номинацияси бўйича танловларни юқори савияда ташкил этсин.

3. Олий таълим муассасаларида “Энг яхши мустақил иш”, “Энг яхши ижодий ёндашув”, “Энг яхши инновацион ғоя” ва “Инновацион таълим” лойиҳалари номинацияси бўйича танлов низоми ҳамда Инновацион ғояларни

қўллаб-қувватлаш кенгашининг намунавий низоми тасдиқланганлиги инобатга олинсин.

4. Талабалар орасида янги стартаплар учун танловлар ўтказиш тўғрисидаги низом 1-иловага мувофиқ тасдиқлансин.

5. Танловларга тавсия этилаётган лойиҳа ва ишланмаларни мамлакат ижтимоий-иқтисодий ривожланишининг долзарб масалаларини ҳал этишга йўналтирилганлигини таҳлил қилиш бўйича ишчи гуруҳ таркиби 2-иловага мувофиқ ҳамда танловларга тақдим этилган лойиҳа ва ишланмаларни баҳолаш бўйича эксперт гуруҳи таркиби 3-иловага мувофиқ тасдиқлансин.

6. Эксперт гуруҳига:

танловларга тақдим этилган лойиҳа ва ишланмаларни мамлакат иқтисодий ривожланишининг долзарб масалаларини ҳал этишга йўналтирилганлиги юзасидан экспертизадан ўтказиш;

экспертиза натижасига кўра лойиҳа ва ишланмаларнинг очик тақдимотига тавсия этиладиган ишларни саралаб олиш;

инновацион ишланмалар муаллифларини очик тақдимоти асосида йўналишлар бўйича ғолибларни аниқлаш вазифалари юклатилсин.

7. Маънавият ва маърифат маркази (Ш.Пўлотов) ўтказилаётган танловлар, уларнинг бориши ва натижалари тўғрисидаги маълумотларни оммавий ахборот воситаларида, шу жумладан университетнинг расмий веб-сайти ҳамда ижтимоий тармоқлардаги саҳифаларида эълон қилиб борилишини таъминласин.

8. Курс деканлари, Магистратура бўлими бошлиғи (Э.Мухамадалиев) ва кафедра мудирлари университет талабаларининг танловларда фаол иштирок этишини таъминласин.

9. Университет Инновацион кенгаши котиби (Д.Камалова) танлов номинациялари бўйича талабгорларнинг иши ва уни асословчи материалларни Кенгашда муҳокама этилишини таъминласин.

10. Бухгалтерия (А.Иминов) ва Молия-иқтисод бўлими (А.Рахимов) танлов ғолибларини университет Инновацион жамғармаси маблағлари ҳисобидан ўз вақтида тақдирлаш чораларини кўрсин.

11. Мазкур буйруқ бажарилишини назорат қилиш проректорлар Н.Салаев ва У.Пулатовлар зиммасига юклансин.

Адлия вазири
Ўринбосари – ректор

 Е.Канъязов

Талабалар орасида янги стартаплар учун танловлар ўтказиш тўғрисида НИЗОМ

I. Умумий қоидалар

1. “Талабалар орасида янги стартаплар учун танловлар ўтказиш тўғрисида”ги Низом (кейинги ўринларда – Низом) Ўзбекистон Республикаси Президентининг 2018 йил 5 июндаги “Олий таълим муассасаларида таълим сифатини ошириш ва уларнинг мамлакатда амалга оширилаётган кенг қамровли ислохотларда фаол иштирокини таъминлаш бўйича қўшимча чора-тадбирлар тўғрисида”ги ПҚ-3775-сон қарорининг 11-банди ва Ўзбекистон Республикаси Вазирлар Маҳкамасининг 2018 йил 14 майдаги 24/1-2020-сон билан тасдиқланган “Олий таълим муассасаларида талабаларни илмий фаолиятга йўналтириш ва уларда инновацион фикрлашни шакллантириш бўйича чора-тадбирлар дастури” нинг 5-бандига мувофиқ ишлаб чиқилган.

2. Мазкур Низом Тошкент давлат юридик университети (кейинги ўринларда – университет) талабалари орасида янги стартаплар учун танловлар (кейинги ўринларда – танлов) ўтказиш тартиби ва баҳолаш мезонларини белгилайди.

II. Танловнинг мақсади ва вазифалари

3. Танловнинг мақсади университет талабаларини илмий фаолиятга йўналтириш ва уларда инновацион фикрлашни, янги ғоя ва ташаббусларни шакллантиришдан иборат.

4. Танловнинг вазифаси қуйидагилардан иборат:

талабалар ва педагог-ҳодимлар ўртасида тадбиркорлик лаёқатини ривожлантириш ҳамда рағбатлантириш;

энг яхши стартапларни аниқлаш ва уларни ривожлантириш;

бизнес лойиҳаларнинг умумий миқдорини ошириш;

лойиҳаларга йўналтирилган таълимни ривожлантириш;

Университетда таълим олувчиларнинг илмий-амалий фаолияти

самарадорлигини ошириш;

келгусида тижоратлаштириш учун интеллектуал фаолият натижаларини яратиш;

стартапларни яратиш асосларини шакллантириш учун янги техник масалаларни ишлаб чиқишга йўналтирилган тадқиқотларни рағбатлантириш; инновацион тадбиркорликни ривожлантиришга кўмаклашиш.

III. Танлов йўналишлари ва номинациялари

5. Танловга қуйидаги йўналишлар бўйича талабномалар қабул қилинади:

ахборот технологиялари;

фан ва таълим;

ижтимоий-иқтисодий.

6. Танловда қуйидаги номлардаги номинациялар бўлади:

“Ижтимоий аҳамиятли инновациялар”;

“Энг ёш олим”;

“Энг яхши инновацион лойиҳа”;

“Истиқболли ишланма”.

7. Университет Инновацион кенгашининг қарорига мувофиқ танлов йўналишлари ва номинациялари рўйхати ўзгартирилиши мумкин.

IV. Танловни ўтказиш босқичлари

8. Университетнинг Илмий тадқиқотларни мувофиқлаштириш ва илмий-педагог кадрларни тайёрлаш ва Илмий-инновацион ишланмаларни тижоратлаштириш бўлимлари ҳамда Маънавият ва маърифат маркази университет Инновацион кенгаши билан биргаликда янги стартаплар учун танлов ўтказади.

9. Танловга тақдим этилган лойиҳа ва ишланмаларни баҳолаш бўйича экспертлар гуруҳидан ҳамда Инновацион кенгаш аъзоларидан иборат ҳакамлар ҳайъати тузилади.

10. Танлов университетда ҳар ўқув йилининг апрель ойида ўтказилади.

11. Университет бўйича аниқланган танлов ғолиблари республика босқичи учун Олий ва ўрта махсус таълим вазирлигига тавсия этилади.

12. Танловнинг республика босқичи ҳар ўқув йилининг май ойида ўтказилади.

13. Танловда иштирок этиш учун талабгор ҳар ўқув йилининг март ойида Маънавият ва маърифат марказига белгиланган шаклдаги талабномани тўлдирган ҳолда мурожаат қилади.

Талабгорнинг истагига биноан талабномага лойиҳанинг моҳиятини (бизнес режаси, видео тасвирлари, ишлаб чиқилган дастурнинг демо версияси, лойиҳа бюджети, лойиҳанинг ҳозирги босқичининг тавсифи, натижаси ва ҳ.к.) тушунтирувчи ёки намоёиш қилинадиган ҳар қандай ҳужжат ва материалларни илова қилиши мумкин.

14. Танловда иштирок этиш учун талабнома белгиланган вақтда тақдим этилиши лозим. Белгиланган муддатдан кейин келиб тушган талабнома қабул қилинмайди.

15. Танлов саралаш, танлов ва якуний босқичларда ўтказилади.

16. Танлов саралаш босқичида иштирокчилар тақдим этган талабноманинг тўлиқлиги ва унга илова қилинган ҳужжатлар ҳамда маълумотларни талабнома мазмунига мувофиқлиги таҳлил қилинади.

Талабнома ва унга илова қилинган ҳужжатлар ҳамда маълумотлар талабнома мазмунига мувофиқ бўлмаса, иштирокчилар танловнинг кейинги босқичига ўтказилмайди.

17. Ҳакамлар ҳайъати саралаш босқичидан ўтган талабномалар асосида танлов босқичини ташкил этади. Шундан сўнг иштирокчилар ўзларининг ишланмалари бўйича тақдимот ўтказишади.

18. Танлов босқичидан ўтган иштирокчилар якуний босқичга ўтказилади. Якуний босқичга ўтган барча иштирокчилар ҳакамлар ҳайъати аъзолари томонидан баҳоланади.

19. Ҳакамлар ҳайъати иштирокчиларнинг тақдимотлари натижаси бўйича ғолибларни аниқлаш ҳамда номинацияларни белгилаш бўйича якуний қарор қабул қилинади.

20. Якуний босқичда танлов натижалари эълон қилинади ва ғолиблар тақдирланади.

V. Ҳакамлар ҳайъатининг вазифалари, ҳуқуқ ва мажбуриятлари ҳамда жавобгарлиги

21. Ҳакамлар ҳайъатининг вазифалари:

танловни ўтказиш тўғрисида қарорни қабул қилиш;

танловни ўтказиш учун зарурий ҳужжатларни ишлаб чиқиш;

танловни ўтказиш тартиби тўғрисида иштирокчиларни хабардор қилиш;

талабгорларга танловда қатнашиш учун зарур бўлган барча

хужжатларни, жумладан талабнома ва тақдимот намуналарини тақдим этиш;
танловни ўтказиш билан боғлиқ ташкилий масалаларни ҳал этиш;
танловнинг якуний босқичини ташкил этиш;
танловнинг ғолиб ва совриндорларига совғаларни тақдим этиш.

22. Ҳакамлар ҳайъатининг ҳуқуқлари:

ушбу Низомнинг талабларига ёки танлов қоидаларига риоя қилмаган иштирокчиларни танловдан четлаштириш;

Иштирокчиларнинг танлов қоидаларини бузганлиги, танлов шартларига риоя этмаганлиги, талабномада нотўғри маълумот берганлиги учун уларнинг иштирокини номувофик деб топиш;

якуний босқич учун лойиҳаларни саралаш, танлаш мақсадида танловга тақдим этилган барча маълумотларни ўрганиб чиқиш.

Ушбу Низом талаблари бузилиши ҳамда танловни ўтказиш тартибига риоя этилишига Ҳакамлар ҳайъати жавобгар ҳисобланади.

**VI. Танлов иштирокчиларининг ҳуқуқ ва мажбуриятлари
ҳамда жавобгарлиги**

23. Танлов иштирокчиларининг ҳуқуқлари:

танлов шартлари ва ўтказилиш тартиби тўғрисидаги маълумотларни олиш;

танловда иштирок этиш учун талабномани белгиланган муддатларда расмийлаштириш ва рўйхатдан ўтказиш бўйича мурожаат қилиш;

талабномани қайтариб олиш;

ғолиб ёки танлов совриндорлари сифатида тан олинган тақдирда тегишли мукофот ва сертификатларни олиш.

24. Танлов иштирокчиларининг мажбуриятлари:

танловда иштирок этиш учун талабларни ўрганиш, танлов предмети билан танишиш;

ушбу Низом талабларига мувофиқ танловда иштирок этиш учун талабномани ўз вақтида тақдим этиш;

танлов ғолиби ёки танлов совриндорлари ҳакамлар ҳайъати сўраган қўшимча маълумотларни тақдим этиш;

ушбу Низомнинг талабларига риоя қилиш.

25. Танлов иштирокчилари Низом талабларини бузганлиги, муддатларга риоя қилмаганлиги, муаллифлик ҳуқуқини бузганлиги учун ҳакамлар ҳайъати уларни танловдан четлаштириши мумкин.

26. Танловда қатнашиш билан боғлиқ харажатларни қоплаш танловда

иштирок этувчиларнинг ўз ҳисобидан тўланади.

VII. Танлов ишларини баҳолаш тартиби ва мезонлари

27. Танловга тақдим этилган ишларни баҳолаш уч босқичда амалга оширилади.

28. Талабномани белгиланган мезонлар бўйича саралашда ҳакамлар ҳайъати лойиҳани талабномада белгиланган мезонлар бўйича танлов мақсади ва қоидаларига мувофиқлиги, шунингдек талабномада кўрсатилган маълумотларнинг тўғрилигини таҳлил қилади.

29. Танлов иштирокчисининг талабномаси қуйидаги мезонлар бўйича баҳоланади:

- ғоянинг янгилиги;
- ғоянинг ижтимоий аҳамияти;
- мақсадлилиги ва мўлжалланганлиги;
- амалий тажрибаси.

Танлов иштирокчисининг талабномасини баҳолаш 0 (ноль) баллдан 2 (икки) баллгача баҳоланади. Бунда 0 (ноль) – мезонларга тўлиқ жавоб бермайди, 1 (бир) – мезонларга қисман мувофиқ, 2 (икки) – мезон талабларига тўлиқ мувофиқ деб белгиланади.

Танлов иштирокчиларининг талабномасини баҳолаш натижалари бўйича баллар тенг бўлган ҳолларда голиб ҳакамлар ҳайъати қарори билан аниқланади.

30. Танлов иштирокчиларининг тақдимотлари қуйидаги мезонлар бўйича баҳоланади:

- ғоянинг янгилиги;
- ғоянинг ижтимоий аҳамияти;
- мақсадлилиги ва мўлжалланганлиги;
- амалий тажрибаси.

Танлов иштирокчиларининг тақдимотларини баҳолаш ҳар бир мезон бўйича 1 (бир) баллдан 10 (ўн) баллгача баҳоланади.

Танлов иштирокчиларининг тақдимотларини баҳолаш натижалари бўйича баллар тенг бўлган ҳолларда голиб ҳакамлар ҳайъати қарори билан аниқланади.

31. Ҳакамлар ҳайъати умумий натижани белгиланган мезонлар бўйича ўртача арифметик қиймат билан аниқлайди.

VIII. Танлов иштирокчиларини мукофотлаш

32. Танлов ғолиблари университет Инновацион жамғармаси маблағлари ҳисобидан қуйидагича мукофотланади:

биринчи ўрин учун – энг кам иш ҳақининг уч баробари миқдорида пул мукофоти;

иккинчи ўрин учун – энг кам иш ҳақининг икки баробари миқдорида пул мукофоти;

учинчи ўрин учун – энг кам иш ҳақининг бир баробари миқдорида пул мукофоти.

33. Танлов совриндорлари сертификат ва совғалар билан тақдирланади.

IX. Яқуний қоидалар

34. Танловни ўтказиш университет Инновацион жамғармаси маблағлари ҳисобидан молиялаштирилади.

35. Танловни ўтказиш жараёни бўйича келиб чиқадиган низолар ушбу низом ва қонун ҳужжатларида белгиланган тартибда ҳал этилади.

**Танловларга тавсия этилаётган лойиҳа ва ишланмаларни мамлакат
ижтимоий-иқтисодий ривожланишининг долзарб масалаларини
ҳал этишга йўналтирилганлигини таҳлил қилиш бўйича
ишчи гуруҳ таркиби**

- | | | | |
|-----|--------------------|---|---|
| 1. | Н.Салаев | – | Илмий ишлар ва инновациялар бўйича проректор, ишчи гуруҳ раҳбари |
| 2. | М.Камалов | – | Ўқув ишлари бўйича проректор |
| 3. | Д.Умаров | – | Ёшлар билан ишлаб бўйича проректор |
| 4. | У.Пулатов | – | Молия-иқтисод ишлари бўйича проректор |
| 5. | Д.Маҳкамов | – | 3-курс декани |
| 6. | И.Эргашев | – | 4-курс декани |
| 7. | Х.Очилов | – | Халқаро оммавий ҳуқуқ кафедраси мудири |
| 8. | У.Тухташева | – | Жиноят-процессуал ҳуқуқи ва криминалистика кафедраси мудири |
| 9. | Б.Ҳидоятлов | – | Жиноят ҳуқуқи ва криминология кафедраси мудири |
| 10. | Г.Узакова | – | Экология ва аграр ҳуқуқи кафедраси мудири |
| 11. | Ж.Абдурахмонхўжаев | – | Илмий тадқиқотларни мувофиқлаштириш ва илмий-педагог кадрларни тайёрлаш бўлими бошлиғи, ишчи гуруҳ котиби |

**Танловларга тақдим этилган лойиҳа ва ишланмаларни
баҳолаш бўйича эксперт гуруҳи таркиби**

- | | | | |
|-----|----------------|---|---|
| 1. | А.Бабаджанов | — | 1-курс декани, эксперт гуруҳи раҳбари |
| 2. | Б.Топилдиев | — | 2-курс декани |
| 3. | Э.Мухамадалиев | — | Магистратура бўлими бошлиғи |
| 4. | Д.Хабибуллаев | — | Фуқаролик процессуал ва иқтисодий процессуал ҳуқуқи кафедраси мудири |
| 5. | Ш.Сайдуллаев | — | Давлат ва ҳуқуқ назарияси ва тарихи кафедраси мудири |
| 6. | Б.Мусаев | — | Давлат ҳуқуқи ва бошқаруви кафедраси мудири |
| 7. | Ҳ.Ботиров | — | Халқаро тижорат ҳуқуқи кафедраси мудири |
| 8. | М.Ўразалиев | — | Илмий-инновацион ишланмаларни тижоратлаштириш бўлими бошлиғи |
| 9. | Ш.Пўлотов | — | Маънавият ва маърифат маркази раҳбари |
| 10. | М.Нажимов | — | Давлат ва ҳуқуқ назарияси ва тарихи кафедраси профессори |
| 11. | Д.Камалова | — | Жиноят ҳуқуқи ва криминология кафедраси катта ўқитувчиси, эксперт гуруҳи котиби |